

陳氏荷華山房詩稿

陳氏荷華山房詩稿卷之十

高安陳邦瞻德遠著

五言律詩九十首

再往留都初發筠城作

金風灑客裳
曉色發河梁
鼓角迎秋爽
亭臯過雨涼
壯心搖仗劍
離思斷銜觴
欲去頻回首
南雲近北堂

安誼公署同友人宋直夫夜坐

秋行興頗饒
野色似相邀
郵舍多連樹
村溪幾

斷橋莫城蟬響集虛館月華飄况有同心語羈
情未寂寥

渡江

曉發潯陽郭寒江正急流霧迷天際樹浪疊雨
邊舟漠漠乾坤意冥冥水國秋自憐飄泊誤白
鳥爾何求

姚孺人輓詩

辛苦成人傑溫良稱女師功高真有相德盛欲
無儀正美椒花頌俄傳薤露詞悲風起朝夕蕭

佩有羅幃

其二

鳳詔仍懸幄魚軒已下堂空庭僵寶瑟落月暗
流黃故跡看如此徽音不可忘休嗟沉婺彩彤
管自寒芒

辛丑之秋自留署乞假歸省沿途觸景輒
成五言一律共得一十六首

鼓枻石城傍中流見歷陽江雲低自白秋水落
還長官散容辭署客深頻望鄉終餘徇祿意能

不愧行藏

其二

頓轡烏江路英雄事可傷時危爭割據運去竟
倉皇今古同蒼狗江山此夕陽蟬聲風外急疑
是楚歌長

其三

孤館停驂後池亭小坐餘樹低藏睡鳥波響動
潛魚境寂天心見機忘物態虛誰知于役者暫
息勝真如

其四

淮西真樂國草樹間田疇俗古忘堯力年豐失
杞憂秋生臨水興雨洗看山眸觸境成吾適歸
興豈倦遊

其五

雨色隨風集雲光薄水寬坐鶯交葉濕飛鷺點
波寒秋似瀟湘度山如罨畫看欣聞農語樂不
嘆路行難

其六

水次兼山次昏星復曉星古城巢父廟仙跡呂
公亭日落山光白雲流石氣青橫塘秋浪濶鷗
鳥自冥冥

其七

過村人語近穿樹鳥聲聞日碎篩篁影風和起
稻雲秋陰歆徑得野色斷橋分岐路忘南北陶
然意欲曛

其八

曉征迷近遠野氣變涼溫雲缺月還漏草深蟲

正喧客心孤轉怯詩思苦逾繁疑入桃源路寥
寥大吠村

其九

傷心還此夕揮手記河梁故國月千里美人天
一方採蘭誰寄遠看菊自懷芳零落孤城候愁
聞畫角長

其十

盡日穿場圃農情處處親民惟拙自古俗以陋
而真醉舞同鄉社謹呼只比鄰此樂吾知久車

馬困風塵

其十一

烟翠滿眉間蒼然五祖山海天傳鉢遠大地雨
花殷塵劫燈何在空門月自閒遙憐苦行者乞
食莫鐘還

其十二

直以踪無定轉知生是浮頻年思故里幾度墜
皇州細雨津亭樹寒烟古驛樓悄然飄泊意不
寐數螢流

其十三

千家烟水集落日解征鞍近岳雲多色臨江月
更寒滄洲心自遠茅屋坐來安野老供鷄黍青
燈語夜闌

其十四

不入蓮花社還投石耳峯驛亭飛鳥近僧榻翠
微重劍欲天邊倚雲長洞口封山靈如妬客應
是厭塵容

其十五

客夢縣宵榻征心動曉軒溫清遊子慕休沐長
官恩先雁來南浦隨秋入故園猶慙田舍叟穩
住白雲邨

其十六

薄日長溪路秋風錦水橋雲看親舍近翠壘故
山饒魚鳥渾相識溪巒總似招何知搖落感綠
葉未辭條

中秋家集

還里仍逢節追歡更敞筵月當今夜滿人是隔

年圓院落千砧裏關河一笛前欲將離合意于
細問嬋娟

九日家集再賦

對酒同諸妙登高况故山清談烟靄外散步翠
微間秋老川原澹林昏鳥雀還片雲如有意留
共客心閒

途中聞

皇長子受冊正位青宮恭述

仙仗臨螭陛綸音出鳳樓九天開玉冊萬國固

金甌霄漢星長麗蓬萊氣自浮端知

皇念切不用計安劉

舟夜

永夜江聲惡客心愁不眠風驚欲捲地濤怒似
掀天燭影蓬窻底更籌斷岸前平生留滯意歲
晚倍堪憐

卽景

客棹仍依岸人家總近堤楓林寒日澹茅屋曉
烟迷渚靜鳬飛近天空雁去低愁心隨木葉吹

落大江西

蕪湖阻風作

風聲前岸急雲意晚山稠
吞吐千重浪冥茫九派流
逢年何計好作客幾時休
險阻尋常事無情怨石尤

雪

薊北三冬熱江南春雪偏

即報京師祈雪

千門寒似水

萬竈曉沉烟柳絮那堪擬
梅花空可憐只應圭竇塞
擁被日高眠

春日雨中同張叅銘馮念雲葉思梅徐羽
蒼陳省堂寅長小集蓮花菴二首

磴道入茅茨松蘿四面垂雲深疑日遠寒重覺
春遲鐘罷僧初定碁殘鳥欲窺自應幽意慙聽
雨忽成詩

其二

勝地喜招尋清談到夕陰樹光經雨淨山翠落
庭深竹葉堪遺俗蓮花可悟心翛然投社意何
似在東林

再過鷲峯寺

古剎枕城阿經行歲月多雲房僧盡老苔逕客
重過殿影移低樹園陰隱薜蘿自憐心未寂懷
舊嘆蹉跎

彭大叅八十

行省功名重還山歲月舒青箱餘視草丹壁早
藏書松菊長幽徑蓬蒿只舊廬
主恩鳩杖在
不復問安車

久雨積水環所居日行坐泥濘中戲述

爲愜幽居興渾忘卑濕憂短墻元傍水小屋更
如舟閉戶波聲動憑軒暝色流恍疑專一壑不
復憶滄州

簡封君

江湖隱客星丹詔動雲扃粉署傳仙吏 清朝
重典刑莫山袍共紫春草綬俱青扶老須靈壽
還應出漢廷

寶光寺訪程彥之山人不值

窈窕度空岑招提掛夕陰六時僧自定三徑客

誰尋樹色前朝古花香別院深不堪回首處鐘磬隔雲林

秋日集王太古齋中同謝少連吳嗣先非熊諸君賦四首

爲有花前約來尋塵外蹤逕幽滋宿雨庭暝駐
高春詞客鄴中集酒人燕市逢相將不能去明
月鳳城鐘

其二

江湖風雅土城市白雲居愛客還賒酒無營但

著書玄言揮麈後譚浪據床餘誰識尊前意能
令世事疎

其三

小院愛清修遲回興未休苔深看石古花密坐
庭幽岼幘天風至銜杯海月流朋簪今正合不
用賦悲秋

其四

鷄黍情非薄間居事事宜不煩開竹逕直欲臥
藤帷盃影燈前數棋聲花下遲祇應幽意愜憑

與故人期

縉雲處士鄭公鄉賢崇祀錄二首

行卓堪敦俗光潛不近名
史收高士傳鄉重汝南評
一代宮牆貌千秋俎豆榮
遙瞻通德里尚覺少微明

其二

老成今已遠遺事轉堪欽
吧咭情何切渭陽恩獨深
江湖歸白骨齋舍集青衿
俱實事薦藻邦人在難忘尚德心

送區子卿還嶺南

風流爾不羣邂逅得論文才豈諸生屈名應國
士聞寒聲連越雁暮色斷江雲巫嶺歸與路梅
花早自芬

與陳易之寅長言別二首

本以墳簞好而深金石盟從兄非異姓愛我是
平生千載貧交意二年拙宦情若爲離別日不
作斷腸聲

其二

天外寒雲積江頭白雁飛頻年愁作客此日送
將歸五斗吾何戀寸心爾不違行藏長傍母未
美老萊衣

禱衣

明月照清砧寒衣禱夜深九秋霜露色千里塞
垣心漏徹聲猶疾風高響未沉無人爲寄遠力
盡淚沾襟

送黃文學北上應制

送君白下城龍劍作雄鳴千里公車路平生國

士情春明花欲發鳳沼雪初晴何限凌雲氣
抽毫賦帝京

送馮士蒙廷評西歸二首

關河千里道歸客思如何潮到潯陽盡雁連南
浦多寒星孤劍逼疎樹片帆過一見家山色歡
來對酒歌

其二

江國長爲客河橋又送君角聲殘曉月棹影拂
寒雲別淚應歌落離心後酒醺白門鴉集處今

夕共誰聞

留別張元平吏部

不淺論交意，遲回惜別心。
君才時自駕，吾跡陸堪沉。
目望雲霄迥，愁隨江海深。
寒聲南浦雁，容易淚沾襟。

留別張大來臧方

栖蹤元枳棘，結侶托鸛鴻。
高論千秋近，微言六藝通。
青門今日別，白社幾時同。
遙憶文章伯，揮毫畫省中。

蕭鶴侶侍御餞別賦謝一律

寂寞郎潛日，憐才獨有君。
春風頻載酒，夜燭更論文。
天上星常聚，斗間氣忽分。
西臺高列栢，回首愧青雲。

留別呂玉繩虞部二首

才子含香署，名家白玉墀。
風猷真世美，儒雅亦吾師。
下士誤葑採，小言藉袞施。
依歸情獨切，不忍賦離思。

其二

有意陪賢社無心問敝廬總因遊子慕復得故人疎含淚聽征雁消愁賴鯉魚酬知無一事丹壁好藏書

留別祝無功給諫二首

鄉國推前輩風流見古人皂囊情獨切芸簡興還新氣味論詩近心期問道親因悲爲別日誰與和陽春

其二

歲月卽潛久關河客去遙離心認烟樹知己在

雲霄花底掖垣漏風前楊子潮追趨無限意有
夢隔漁樵

答別張叅銘寅長

爲郎嘆滯淫所喜獲同心我自他山石君惟南
國金千秋看意氣一日動悲吟此別愁無限交
情翻恨深

贈劉廷評運齋兼以爲別

經術名家秀循良漢陸傳詔書徵卓茂執法借
庭堅盡省趨陪日青門悵別天倉皇易分手衰

雁叫江烟

出白門之日留都諸友人餞送依依幾不
成別賦此志感

何事青門外臨岐共泫然詩清諸子惜宦薄故人憐
宦道寒楓落客程暮鳥連帝城猶可望
無故起新烟

夜泊江寧鎮

竊冬還舊國薄暮發長干迢照依山歛歸雲近
水殘荒村鴉陣暗野館雁聲寒却以飄零舊渾

忘道路難

姪孰夜坐

憶管龍飛日天戈向此邦壺漿傾道路歌舞渡

長江杖策初逢鄧

陶安

前茅早縛靡

陳也先

停觴話

往事夜燭剪塵窻

過蕪湖有感時事因賦

舊識蕪湖路車航至似歸誅求誰教急商旅近

全稀主聖民堪恤時清事漸非無端憂杞意客

淚易沾衣

繁昌道中

候館霜威薄征車曉色和平郊餘水竹小邑有
絃歌樹對高齋古山看近郭多自憐長作客僻
地亦經過

塔山寺

古刹塔名山山僧盡日間白雲看自在流水聽
潺湲乞食荒村莫鳴鍾杳靄間應嗤軒蓋客來
徃抗塵顏

自石埭踰桃嶺泊宏潭公館

窈窕穿盤谷，紆迴轉曲阿。躋崖看日近，出峽見
天多。暝色依叢薄，寒聲動薜蘿。憑誰慰蕭索，勞
者自爲歌。

羊棧嶺二首

連峯何日開，縣棧亦奇哉。地已羊腸盡，天仍馬
首回。藤垂千歲木，石繡萬重苔。更着清猿嘯，何
如蜀道哀。

其二

千嶂疊欽崙，窮高力不任。雲低如礙足，天近欲

捫參作客長奔走還鄉亦滯淫
悲風吹古木日莫更蕭森

道中卽景有懷吳明府

獨有淹留處偏餘惜別情
一杯官道酒千里異鄉程
疎樹和烟隱寒山逼雪明
離愁兼別懷疲馬復嘶鳴

寄懷湯樗存比部

冠帶稱吳會風流見楚才
持衡爽鳩署作賦鳳凰臺
社自招賢結尊遠問字開
獨憐南浦客烟

樹首空回

蓮花寺

古路出叢林春山啼鳥深
蓮花何處現佛日自侵尋
講院苔光靜經堂草色陰
無心祈說法隨意且登臨

崇真觀舊傳旌陽陳丹處
手植樟一株識其處今不存
惟丹井無恙

仙令栖真處千秋有故壇
寒泉長瀉王古竈自藏丹
日影苔堦澹雲光石壁殘
遶垣森樹色猶

作舊時看

臨江梅巖閣晚眺

高閣倚江邊江流正渺然
帆歸欹晚照鳥去亂寒烟
山色平蕪外人家綠樹前
梅花何處落城角滿霜天

中秋夜有懷署中諸君子

風露逢良夜雲霄憶舊遊
一杯遙對月千里共分秋
楓葉江邊冷桂華天上幽
離心何處切橫笛在高樓

九日小集

佳節成高會
尊前共解顏
語深移白日
興至繞青山
世事何人少
秋雲向我閒
朔風催雁度
霜信到江關

長門怨

一自長門掩深宮
不見春簾垂花影
隔窗靜鳥聲
親歌舞閒金屋
芳香謝錦茵
向來回輦處
細中欲棲塵

少年行

密侍青娥擁驕行白馬飛開筵招戚里投刺謁
金閨夜月歌鐘市春風錦繡園落花香滿路處
處惹羅衣

別館

別館衆峯陽門廻一澗長雲天秋獨遠風雨夜
多涼蒼翠間窺坐潄溪靜繞牆無心問世路山
水是吾鄉

秋夜

村居歲月深荒徑少人尋又落空山葉誰憐獨

夜心早霜邊雁至落月嶺猿吟何限天南北愁
思不可禁

雨夜獨酌

寂寞村居裏誰憐貧病兼雨聲經夜切風氣近
冬嚴殘卷伴人老寒燈向影淹尊中有醺醪爲
爾一掀髯

寄吳曰瞻

故人今寂寞白日掩重關俗事貧來少餘年病
裡閒詩情知未減酒興得無慳不盡思君意寒

雲白滿山

初冬

正憐秋色苦朔氣已凌冬
獨樹葉無幾遠天雲
自重寒蕪依古路斜日下孤峯
愁看斗杓北玄
霄霜露濃

山村

寂寞身何累浮沉道自存
春雲遶盡省秋雨臥
山村樹色遙通逕溪聲近在門
心期有如此世
路不須言

小築未遂值雨有作

數椽方未就風雨急相侵復少對床客難爲長
夜心細書過眼澁孤燭向人深多少淒涼意寒
聲接遠林

冬暖

豈謂窮冬候空出氣自和負簷知背暖倚戶任
頭科霜色侵梅薄雲光弄竹多看山與臨水此
意未婆娑

漫感

詩酒情何薄溪山計少親後時愁歲莫多事厭
家貧零落青雲志棲遲白髮身除書君莫問久
積漢庭薪

送宋直夫北上偕計

征輶是壯遊嘶馬不須愁一箭城堪下千金賦
可酬春風生御沼花色動皇州遍踏章臺路
同誰問酒樓

李司理泰階以謫宦久寓天界寺柬贈二
首

客有招提住悠然謫宦情新詩隨處得夜語共
僧清眼底浮雲變尊前世事輕從來風浪濶海
鳥未曾驚

其二

名山修竹館開士白雲屏美爾題詩遍慙予載
酒違鐘聲雲外落花雨梵間飛欲識懷人意朝
朝望翠微

送卞上舍應徵還廣陵

已信還家樂偏憐作客心高堂新白髮游子舊

青衿庭草餘春色井梧換莫陰遙知歡會處燈
火比鄰深

呂王繩北上還自東省索贈

憶爾朝天去重陪劍履班日華開鳳曆雲氣候
龍顏花更玄都看柳還太液輦兩都同侍從不
藉賜宮環

其二

見說南歸日奇遊訪岱宗地形天下小海氣日
邊重白馬飛遙練蒼鱗樹古松新詩題處遍應

被紫雲封

陳氏荷華山房詩稿卷之十終

陳氏荷華山房詩稿卷之十一

高安陳邦瞻德遠著

五言律詩九十一首

夜泊黃梅有述

落日在松林春山滿地陰
雨添田水濶風落鵝花深
客有探幽興僧餘出世心
簪時衣鉢地鐘磬度遙岑

野興

江縣何寥濶楚天况渺綿
亂溪流野水百里見

平田春事生農耒人家近曉烟客懷堪騁目鄉國喜相連

途中有懷署中諸君子

自別青門路常懷畫省香美名高水鏡好友盡
裴王觴詠偏能數風流不可忘夢中春園路竹
樹滿池塘

寄何玉峴年兄時玉峴初解 詔獄歸里

豈謂分麾日翻成對簿年無心愁畫地有志欲
扶天事已風波失恩仍雨露偏生還今日事緣

髮故依然

其二

自邇逢羅網幽憂幾歲除欲吹鄒子律還授夏
侯書夜月繩床冷秋風戛枕虛前賢詠八物此
意未蕭疎

李獻吉有
獄中八詠

其三

夢裏長安日歸來白下春丹心猶戀主素業
且依親湖海氣難盡名山意獨真屬君須自愛
吾道豈沉淪

寄曾見虞年兄

見說西昌路悠然烟水深美人不可見悵望愁
予心夜月惟猿嘯春風更鳥吟只今塵世士誰
解問中林

其二

世網那堪觸斯人不可羈一辭朱紱去長與白
雲期韞藉還前輩風流實我師衡門清泌裏但
說已忘饑

恭聞有 詔罷礦志喜一首

恩詔傳 丹陛宸恩動 冕旒風雷生北極
雨露遍神州 擊壤知堯力 瞻天矢杞憂 小臣疇
志喜酌酒但長謳

其二

聞罷瓊林賦 歡傳王几音 幾年憂地脉 今日見
天心 漢闕璫聲入 秦山寶氣深 君王方却貢
萬國自輸琛

元日試筆再賦

三朝啟黃道 萬象入青陽 岸柳含烟暖 園梅浥

雨香衣冠隨雁序
劍佩憶鵷行
獨酌長生酒
殷勤進北堂

新年雪

麗景入新年
韶光動遠天
雲連千樹白
風送六花妍
柳色溪橋外
梅香野店邊
不妨乘夜興
明月滿前川

春愁

簪紱情何戀
蓬蒿跡未安
勞生成久病
竊食愧微官
窮巷過春雨
荒庭起暮寒
欲眠渾不寐
倦

聽鳥聲殘

里居雜興八首

幾歲倦爲郎浮沉意獨長
名微官莫問性懶臥
何妨採蕨來中谷澆花傍古墻
豈言幽事足暫得物情忘

其二

舊業在青山山頭故沼開
蓮花今不見仙子去
無還丹竈蒼烟沒石床
碧蘚斑幽棲真我意
流落愧塵寰

其三

風雨悲春莫園林喜晚晴飛花閒自落栖鳥欲
無聲茅屋烟初歛高樓月正生山居鄰古廟寂
寞聽鐘鳴

其四

功業多岐路英豪各赴時龍門爭作客鬼谷競
求師椽爲拔三語侯應出六奇營營殊未已咄
咄爾何爲

其五

徙倚臨卅壑長吟入翠微
地間芳艸細谷遶紫芝
肥隔水聞樵響背林見
鳥飛農談逢野叟薄
莫不能歸

其六

隔歲傳天語如聞赦
直臣園扉回白日天地
聖皇仁作解民方切
屯膏事有因何時哀痛
詔一灑萬方春

其七

川原猶夙管杖屨異追隨
生事窮簷迫土風薄

俗移對花仍斷酒聽雨不成詩多少傷春意蕭條只自知

其八

章臺曾走馬長樂舊聞鐘不逐天邊仗來看江上峯一官成冗散萬事寄疎慵本意輕榮達非關學曼容

齋居示友

鎮日高齋裡翛然意出羣庭虛花影至院靜鳥聲聞喜氣生時雨閒情對暮雲故人堪晤語斗

酒坐忘醺

送劉養素

風雪薊門路停杯感舊遊
飄零仍作客搖落况逢秋
烟暝天邊樹潮生月夜舟
懷人知有恨江上莫登樓

其二

憐君爲客久道路幾時休
雲水雙蓬鬢關山一敝裘
中宵防夢斷萬里怯囊羞
猶勝郎潛者書空坐自愁

村行

十里南湖路村行野興偏
稻畦滋宿雨茅屋帶新烟
彷彿思前事嬉游記少年
溪山隨處好吾計在歸田

出都門之二日途中感雨

河橋不可見昨者倒離杯
酒力此中盡客顏何處開
雲山侵意亂風雨赴愁來
滿目郊原隔春光幾欲回

阻雨姑孰聞龍山在近不得登有作

聞說龍山近風流憶孟嘉振衣聊可往落帽便
堪誇雨暝人行少天高鳥去斜寂寥千載意獨
坐起長嗟

涇縣道中

野色麻源路褰帷愛晚晴宿烟茅店直新水石
橋平雲去樹初淡雪殘山更清客情纔一愜不
厭緩歸程

雪中度輦嶺三首

嶺勢逼空雪光晃濛濛其奇絕輒有此作

絕磴元無路窮崖忽有梯纔驚丹壁迥忽訝白

雲低側足羊腸遶回頭鳥翼齊星河知不遠只在數峯西

其二

豈謂升雲棧真成到雪山地湧玻璃界天開白王關濤聲河漢外海氣闕風間一點青微露遙疑帝女鬟

其三

平看猶萬仞乍轉卽千盤但覺天門近那知鳥道難巖巒銜目動睥睨薄雲寒擬作遊仙曲乘

風躑紫鸞

舟夜書懷

不盡漂淪感長爲汗漫遊江山能自美風雨解
兼愁歲晚悲蓬髮春寒怯敝裘誰堪酒醒後寂
寞繫扁舟

舟次島湖移宿民舍漫成

風雨愁人夜維舟對石淙寒聲來斷岸疎點落
蓬牕燈火知沽市烟波認釣艘人家如可傍不
厭宿塵幢

鍾陵遇雨作

幾度鍾陵路還從暮雨過江山愁去住琴劍感
蹉跎新水平橋遠寒煙野屋多傷春無限意對
酒不成歌

王嶺公署詠竹

玉嶺憇征鞍蕭疎竹幾竿牆光經雨潤野色挾
雲寒客路堪乘輿空亭得靜看因懷枚叔賦轉
自惜檀欒

曲水

官亭堪繫馬古渡正蟻船
蓀筵披晴霧茅簷出
午煙青天低拂樹綠水曲通田
舊識農家路還
令野興牽

宿新淦棲禪寺

萍踪還淦浦蘭若足棲禪
夜雨妨僧定孤燈照
客眠鶯花春漸晚江海夢長縣
來往風塵際偏
多淨土緣

莫春新淦道中

風光已莫春游子自悲辛
本有山林性長爲道

路人雨花殘候館煙樹暗江津
攄以飄零舊傷心事事真

峽江夜雨

春莫來江縣淒清氣似秋寒
雲生玉峽新水落沙洲小市
魚鰕少空山鳥雀稠掩關成
獨宿燈火照羈愁

池溪壁上見友人黃貞父黃中
介舊題憶與二君別三年矣作
此志感

故人題壁處燈下憶曾看煙樹
心長切莓苔字

未殘隋珠原照夜
郢雪尚生寒
亦有羊何句
吟成欲寄難

建德道中

山盤疑路盡
水斷忽橋通
縣治千峯裏
人家萬木中
松林藏薄日
稻壠漾微風
問俗知淳古
無由作寓公

夏日過靜海寺假寐偶成

自笑周南客
招提幾度來
舊僧聞退院
古跡記登臺
暑氣花宮淨
香雲寶殿開
竹床眠未穩
隨

意步莓苔

代壽張廷尉尊人九十一翁

玄草楊雲宅
烟花錦里村
韶顏百歲近
舊德四朝存
道本幽人靜
星仍執法尊
遙知稱壽日
車馬滿高門

七夕

日落風生樹
天斜月在庭
關山愁獨客
河漢會雙星
夜色猶堪賞
秋聲不可聽
空齋蕭索裏
坐數流螢

朝天宮送客偶憇姜道士房作

小憇愛新涼
丹宮白日長
殘芳紅樹暗
嫩葉翠柯香
久悟邯鄲夢
聊眠道士床
離心何處覓
浮世此中忘

至日雪中上陵

幾度鍾陵路
看山興不窮
更疑風雪裏
真在畫圖中
皓色凝神寢
寒光逼曉空
觀臺應紀瑞
雲物萬方同

聽催耕

陳氏有書曰房山詩集卷之十一
十一
催耕山下鳥幾度盡情啼雨過聲猶切雲深聽
却迷麥畦連籬雉茅屋蒼鳴鷄多少爲農意因
之坐日西

午日

故園榴艾色滿眼爲誰明世路棲遲穩山居歲
月驚綠陰移午樹紅日下前楹競渡人間急誰
知獨坐情

與朗上人步月同祇台吉甫賦

山房暑氣平草樹趣幽行避客塵情遠逢僧夜

語清天空流月色澗近過泉聲處處遠禪味無
勞問化城

訪朱諸卿侍御經宿言別猶不忍遽歸程
迫莫街鼓已動方抵寓所因成

訪戴興難盡歸驂已落暉澗梁新潦急村砦夕
春柿遠樹依山歛疎星映水微未須愁夜角猶
及款城扉

灰埠道中

秋雲射日黃官道出層岡樹色人家繞灘聲小

市長石殘山骨瘦土潤水膏香正喜青苗盛漫
田笑語將

舟次阻風

鬼子步鮎魚洲俱地方

朔風吹木葉日莫更蕭蕭古廟三朝在青山十
里遙魚洲空載酒免步暫停橈南望仍回首依
稀見石橋

田使君大觀樓二首

代作

高樓遲遠日勝日好登臨雲送王喬舄風清宓
子琴人煙雙市合春樹萬家深洵美仍吾土何

如王粲心

其二

層軒臨水迥飛棟與雲浮落日還凭檻青山盡
入樓江鄉增勝事名士想風流况復聞新唱長
留兒女謳

舟過王家渡

古渡曾經櫂薄遊此重過帆檣新水落烟樹舊
村多漫憶勤王事還爲對酒歌功名真偶爾華
髮豈蹉跎

泊趙家圩夜坐

輟棹見平田人家楚水邊夕陽沽酒市宵火打
魚船雲樹滄洲裡煙波斷岸前無端留滯意丙
夜不成眠

初抵杭城漫述

江上早潮平衝潮盡槳明霜吹寒曉角日色澹
前旌羽衛千軍氣笙歌萬井聲非才慙范孟何
以效澄清

縉雲道中

山城何犖确野景亦繽紛窮谷疑無路連峯盡
入雲日斜人影散樹密鳥聲聞寄語巢居子長
隨鹿豕羣

柳州亭

乍踏亭臯路渾疑晷盡天夕陽在疎樹飛鳥沒
寒煙嵐氣經霜薄湖光過雨鮮暗香何處早把
酒憶逋仙

署中對雪

六花何處剪有女在瑤臺春色生庭樹寒光落

酒杯千山煙景變四座盡圖開子夜江村色憑
誰覓早梅

梅花嶼在西湖上

梅花樹幾行孤嶼帶橫塘雪在難分色風來始
悟香橫斜依夕照清絕間修篁此夜看明月佳
人不可忘

雷甸舟次以送臺使至

豈有川流與扁舟復此行解維春樹色欹枕午
鷄聲似入茗溪路空縣峴首情遲回歸棹晚攄

爲厭逢迎

荅車春涵大叅二首

尚憶湖山署爲郎接後塵風流原未隔邂逅果
能親敝帚吾何享琅玕爾勿珍從今數酌唱秀
句一時新

其二

武林登眺處忽自使人傷宿霧常遮目愁霖總
斷腸湖天浮水遠江路入雲長不盡懷人意緘
題向枯蒼

初秋夜坐

江城秋暗度旅館葉還飛節變心俱折愁生髮
欲稀漏疑前夜短樹覺早涼歸徙倚空簷下回
看斗柄微

七夕

歲時還七夕風俗更杭州聞道湖船女爭歸乞
巧樓輕雲籠月度疎樹帶星流不有乘槎客憑
誰識女牛

雨後

官亭梧竹幽獨坐夕陽收雨氣銷殘暑風聲送
早秋關河常在目杼軸正堪愁心賞應難慙鳴
蟬樹樹稠

崇德舟夜

自笑風塵客胡爲雲水鄉漁歌來款乃秋色在
滄浪月映蓬窻近風生葦岸長空江過夜半起
坐聽鳴榔

中秋對酒二首

水月杭州夜清虛似廣寒未成湖上約聊向署

中看座愛桂香滿杯飛竹葉乾庭鳥休繞樹好
傍一枝安

其二

若論中秋好杭州定少過海門潮正上湖面月
偏多豈有乘槎興空爲對酒歌獨餘清夢在天
路躡銀河

鄭使君招飲嚴之西湖仍移席思范亭二
首

龍角枕吳根湖山日在門管人雲臥久勝事水

嬾存窈窕深移島蕭疎遠傍村欲知心賞慙魚
鳥近開尊

其二

繡嶺接雲平澄湖盡日清遁嚴留郡姓思范重
亭名載酒中宵興風流百代情月華歸路滿猶
帶客星明

夜發皂林

酌罷郵亭酒行行重客愁寒深煙裏樹夜放雨
邊舟鳥宿千山靜漁歸一壑幽蓬牕燒燭短孤

影向人羞

巳酉元日二首

大府官寮盛明廷
仗衛繁屢端崇百禮
啟泰正三元仙梗縣
朱戶靈葩泛綠尊
遠臣慙忝竊何以奉隆恩

其二

彩霧輝南極韶華永
北堂斑衣長趺舞壽酒
正盈觴日傍湖山麗
春歸花柳香高臺望雲物
占喜得農祥

元夕三首

燈火湖山地祥光處處通月連雲水白花遍綺
羅紅笑話徵人豫歌謠兆歲豐名都饒勝事京
洛未言旌

其二

士女正聯翩踏歌舊俗傳爭憐明月夜不負艷
陽天寶馬三條遍香塵九陌連朝來狹斜路金
粉認遺鈿

其三

不盡花間漏。俄橫醉後參。春光動河漢。夜色滿
江南。麴蠶誰爭帖。膏湯更乞蠶。自從疎貴戚。無
意問傳柑。

孤山見早梅作

雪下孤山路。幽芳忽返魂。美人愁獨立。明月自
黃昏。風細香微度。雲寒影不翻。相看何寂寂。桃
李尚無言。

試院中秋對月二首

江城過細雨。海嶼捲輕雲。月向中天滿。秋從此

夜分棘闥聊對酒
藜杖好論文
千古湘靈在瑟
聲如可聞

其二

殘星連北斗
永夕對南樓
河漢疑非夜
關山總是秋
天香來桂闕
海氣上瀛洲
多少探驪客
珠光共月流

春日偕丁禹門左伯馮景貞管五陵二憲
使赴馮都閫鼓山之約午憩靈源洞遂登
大頂峯夜歸五首

古路雲邊迥春原雨後新入山逢好景載酒及
芳辰石磴初尋徑香臺已出塵自憐幽意慳暫
與野僧親

其二

仙山高不極勝景到來稀漱石天漿冷捫蘿鳥
道微半巖紅日隱深洞白雲歸獨有幽棲意徒
悲未拂衣

其三

行處天門近望來海氣低剎湧蓮花現峯排石

笛齊春風吹碧霧夜火散青藜共喜羣星聚非
同七聖迷

其四

不以飛鳧至翻疑跨鶴來諸天窮上界勝侶盡
仙才匝地雲千疊浮空海一杯登高漫作賦談
笑指蓬萊

其五

野暝頻移席嵐寒欲浸衣初疑天上去還向月
中歸雲水思遺世風塵好息機那堪回首處鐘

磬隔禪扉

友人景濂丈過訪閩署賦別二首

洞山故
共學處

豈是南州榻能令高士過五年離夢斷千里故
情多意氣悲馮缺流光嘆魯戈一尊岐路酒休
惜醉顏酡

其二

度嶺縱橫路連峯大小關自嗟爲客遠况復送
君還聽雨懷南浦傳燈記洞山可憐招隱意桂
樹未堪攀

題馮定宇都閫小像作道人服

法本傳黃石心常愛白雲尋仙真得意破虜不
言勲去矣青油幕條然羽客羣祇應驚燕領還
識故將軍

送甘宮亭憲副入賀

念爾趨朝日偏深謁帝情鵷班曾待漏鸞掖舊
登瀛東閣論前輩西臺識大名遲回三十載休
復厭承明

其二

總以歸依切翻成離別難通家推舊德同舍接
新歡楚樹臨關迥江天過嶺寬那堪搔首處四
壯是長安

陳氏荷華山房詩稿卷之十一終